

# Pauca acceptanza tar ils pertutgads

Brigada d'infantaria da muntogna 12

DA GION NUTEGN STGIER / ANR

■ Il cumandant Franz Nager è cuntent cun l'engaschament da cader e schuldada. Il 2015 vegnan tuts sis battagliuns da la brigada a far lur servetsch en noss chantun. In battagliun vegn er ad esser en acziun tar il Forum mundial d'economia a Tavau. A chaschun da l'ensolver per las medias ha Franz Nager, il cumandant da la Brigada d'infantaria da muntogna 12, ludà ils 7000 schuldads ed uffiziers che prestan lur servetsch militar en quella brigada. El ha er ditg che a la fin dal 2016 saja quella brigada istorgia pervia da la refurma da l'armada. A partir dal 2017 vegnan lura tut las truppas da quella furmaziun ad appartegnair ad ina da las novas divisiuns territorialas. Ina buna part dals schuldads vegnia probabel a far ses curs da repetiziun sut il commando da la Divisiun territoriala 3 che saja staziunada ad Altdorf, ha ditg Franz Nager.

## Cuira vegn da nov lieu da la Brigada mecanizada 11

La Brigada d'infantaria da muntogna 12 datti dapi il 2004 è la sedia principala è adina stada a Cuira. A la fin dal 2016 vegn quella furmaziun a tutgar al passà, quai pervia da la midada da struttura da l'armada. Er sunter quella restructuraziun vegn la chapitala da noss chantun vinavant a porscher tetg ad ina furmaziun militar e quai a la Brigada mecanizada 11. La piazza da commando da quella mida da Winterthur a Cuira, uschia che Cuira resta er en l'avegnir in dals gronds commandos



Il cumandant da la Brigada d'infantaria da muntogna 12, brigadier Franz Nager (san.) cun colonel Lorenzo Rampa, in da ses collavurats principals.

FOTO G. N. STGIER

locals en Svizra. Brigadier Franz Nager ha ditg che quai saja cunzunt in grond merit da cusseglier guvernativ Christian Rathgeb. Il schef dal departament da militar saja s'engaschè ferm tar il cussegl federal per mantegnair en il futur las truppas a Cuira.

## Strusch cumenzadas e gia a fin

En vista a la midada da la refurma da l'armada e ses svilup vegn la durada dals curs da repetiziun da las truppas eventualmain reducida da trais sin be duas emnas. Uffiziers e schuldads dal

Battagliun da muntogna 6, in dals battagliuns da la Brigada d'infantaria da muntogna 12, ha gia quest onn fatg ina emprova cun in curs da repetiziun che ha cuzzà be 14 dis. «En general fatsch jau ina bilantscha positiva da quel experiment», ha ditg Franz Nager. L'admi-

nistraziun dentant chaschunia gronda lavur ed er tar il commando haja el constatà intginas flaivezzas, ha menziunà il cumandant da la Brigada d'infantaria da muntogna 12. Cun strusch esser cumenzadas las duas emnas ed en pauc temp er esser gia quellas a fin saja simplamain betg stà a disposiziun temp per far las correcturas necessarias sin stgalim da las cumpagnias, ha accentuà Franz Nager. Ultra da quai sajan uffiziers e schuldads strusch stads entusiasmands da quella emprova. L'acceptanza tar ils pertutgads saja stada minima. Decider en quella chausa vegnia il parlament naziunal en il decurs da l'onn proxim.

## Danovamain in grond exercizi

Exercitar ed anc ina giada exercitar, quella devisa saja er quest onn stada en il center da la scolaziun da las truppas da la Brigada d'infantaria da muntogna 12. Er il marsch obligatoric da 20 km saja betg mo stà bun per la sanadad da la schuldada, mabain saja quel puspè stà ina buna chausa per la collegialitad da la truppa. Er il 2015 saja il marsch da 20 km ina part dals curs da repetiziun. Quels absolvan tuts sis battagliuns da la brigada en il Grischun. Sin il program stat danovamain er in grond exercizi sin il stgalim battagliun cun il num «Houdini», che vegn ad avair lieu da Tusaun fin Maiavilla. In battagliun vegn er a far servetsch durant il Forum mundial d'economia ed il Battagliun d'infantaria da muntogna 85 vegn schizunt a preschentar sia lavur tar la «Higa» il matg 2015.